

TEZAUUR LITURGIC
25 SEPTEMBRIE

ACATISTUL
SF. CUVIOASE
EUFROSINA
DE LA
ALEXANDRIA



MOSCOVA, 2000



Акафист

святой преподобной

Евфросинии Александрийской

Кондак 1

Избранная Богом от благочестиваго рода для прославления имени Господнего своим житием непорочным, святая преподобная Евфросиние, к чистым стопам твоим припадаем и умиленно тя просим: простри ко Господу Богу руке своя и умоли за нас Творца всяческих, да помилует нас в сем житии, вопиющих тебе:

Радуйся, преподобная мати Евфросиние, радость в любви ко Христу испытывавшая.

Икос 1

Ангелом святым уподобившись, богобоязненнии родителия твоя, преподобная Евфросиние, печалуясь о бесплодии своем, непрестанно Господа моляху, да послет им чадо во утешение. С высоты небесныя преблагий Господь на милосердие, моления и пощения рабов Своих взирая, благоволи, по молитвам

игумена, благословити благочестиваго отца твоего Пафнутия и разрешися неплодие матери твоея. Мы же, с родителями твоими, прекрасная Евфросиние, рождению твоему радуящися, воспеваем ти:

Радуйся, у Господа родителями твоими со слезами вымоленная;

Радуйся, родителем твоим Господом за милосердие и смирение дарованная.

Радуйся, утешением им неизреченным ставшая;

Радуйся, ими благочестию и праведности наученная.

Радуйся, с младых лет в православной вере воспитанная;

Радуйся, заповеди Божии в сердце своем сохраняющая.

Радуйся, преподобная мати Евфросиние, радость в любви ко Христу испытывавшая.

Кондак 2

Видя девственную чистоту жития твоего, преподобная Евфросиние, велие благоразумие твое и красоту лица твоего, многия от

благороднейших и знатнейших семейств Александрии желаху имети тя супругою своих сынов. Отец же твой Пафнутий, на волю Божию всецело полагаяся: «Да будет тако, яко же есть угодно Господу!», хвалы Ему пел неустанно: Аллилуиа.

Икос 2

Разуму своему просвещения свыше прося, пришедши Пафнутий со дщерию своею во обитель, рекл игумену о чаде своем: «Аз приведох к тебе, святой отче, дочь мою, ея же ми Бог даровал есть по молениям твоим; прошу тя, отче, помолися о ней, хошу бо отдати ея в замужество». Ты же, благоразумная Евфросиние, к ногам старца припадая, просила еси его: «Прошу тя, отче, помолися о мне, да спасет Господь душу мою», о замужестве ничуть не помышляя. Научи же и нас о небеснем помышляти паче, нежели о земном, воспевающих ти сице:

Радуйся, благоразумием Господом щедро одаренная;

Радуйся, ликом красивая, душею же прекрасная.

Радуйся, тело и душу добродетельми
очистившая;

Радуйся, мудро житие свое устроявшая.

Радуйся, быти одушевленным храмом
Божиим свыше благословленная;

Радуйся, гласа Христова, зовуща к
бессмертной жизни, послушавшаяся.

Радуйся, преподобная мати Евфросиние,
радость в любви ко Христу испытывавшая.

Кондак 3

Сила Божественная благодати воистину
укрепи тя, мужественная Евфросиние, егда по
тайнем пострижении твоём, в мужеския одежды
облеклася еси и тайно от всех от дома своего
отшла еси, жениха земнаго отрешившись и к
Жениху Небесному во сретение устремившись,
Ему же сладце пела: Аллилуиа.

Икос 3

Имея велию любовь к возлюбившему тя
Господу, богоблаженная Евфросиние, житием
иноческим угодили Ему восхотев, за евнуха
Измарагда себе выдавая, во обитель мужескую
вошла еси и труды иноческия подъяти

потщалася еси. Мы же, таковому подвигу твоему удивляясь, воздаем ти хвалы сии:

Радуйся, богодохновенная мудрости от младых лет исполненная;

Радуйся, девством и целомудрием сияющая.

Радуйся, яко крепость мужескую на труды иноческие дарова ти Христос;

Радуйся, яко Божественною благодатию укрепленная, Жениху Небесному верно служившая.

Радуйся, подвиги иноческие на хрупкия плечи своя небоязненно подъявшая;

Радуйся, теми Господу угодившая и награду нетленную стяжавшая.

Радуйся, преподобная мати Евфросиние, радость в любви ко Христу испытывавшая.

Кондак 4

Бури искушений воздвиже враг рода человеческого на тя, прекрасная Евфросиние, смущаху бо ся многия из братии нечистыми помысли, уязвляше бо диавол сердца их красотою лика твоего. Ты же, сего ради, во уединении жити обреченная, скрывая тленную

красу свою, душою нетленною в Боге пребывала еси, Ему моляся тепле: Аллилуиа.

Икос 4

Слышаще и видяще блаженный Агапит велии подвиги и труды твоя, преподобная Евфросиние, повествоваше о ня всей братии в назидание. Мы же, купно с ними поучаемся подвигами твоими и прославляем Бога, даровавшего таковую силу ти, поюще тебе сице:

Радуйся, Креста всеоружием оградившаяся, враги побеждавшая;

Радуйся, молитвою пламенною услаждающаяся, с Господом непрестанно пребывавшая.

Радуйся, яко светом Христовым просвещенное сердце имела еси;

Радуйся, яко любовь Христовою навечно уязвилася еси.

Радуйся, во Владычии пречистые длани надежды своя возложившая;

Радуйся, сугубый венец от Христа Жизнодавца достойно приявшая.

Радуйся, преподобная мати Евфросиние, радость в любви ко Христу испытывавшая.

Кондак 5

Боготечную звезду в тебе явленную найти тщашеся, искаше тя повсюду благочестивый отец твой и братию моляше да откроет по молитвам я Господь твою участь, Евфросиние святая. Ты же, днем и ноцию ко Господу молилася еси, да не откроет Господь никому же о тебе в сем житии, и Бог тя слышаще, ты бо пела еси Ему верно: Аллилуиа.

Икос 5

Видевши игумен обители идеже подвизалася еси ты, мати наша Евфросиние, яко отец твой велиею печалию по тебе истаяваем бысть, посли его к тебе в келию, да утешение от тебе примет, яко мняше тя исполненною Духа Святаго. Мы же, таковую милость Божию на тебе зряще, восхваляем тя звании сими:

Радуйся, светом Триипостасным еще в земном житии осиянная;

Радуйся, небесный чертог еще на земли себе уготовившая.

Радуйся, разум богоносный денно и ноцно стяжавшая;

Радуйся, добротою благочестия чистее злата блистающая.

Радуйся, сияния Божественного ныне насыщающая;

Радуйся, ночь жития всеумдро прошедшая, день невечерний постигшая.

Радуйся, преподобная мати Евфросиние, радость в любви ко Христу испытывавшая.

Кондак 6

Проповедницею истинного боговедения и велией любви ко Христу явилася еси, премудрая Евфросиние, егда любовь отца своего земного не презревая, обаче в печали по тебе с любовью дочернею его тепло утешая, Отцу Небесному зывала еси слезно: Аллилуиа.

Икос 6

Воссияла еси, блаженная Евфросиние, зельными трудами и воздержанием тело твое удручаючи тридесять и восемь лет, в уединенном житии воспевая ко Христу победную песнь над враги видимыми и невидимыми. Всего же величества деяний твоих изрещи не могуще, малую мзду хвалебную воздаем тебе сице:

Радуйся, нищету Христову вольно
возлюбившая;

Радуйся, сего ради богатство исцелений от
Бога приявшая.

Радуйся, яко рососою воздержания пламень
страстей погасила еси;

Радуйся, яко Жениху Слову честное девство в
дар принесла еси.

Радуйся, тем же в чертог славы Христом
введенная;

Радуйся, со Ангелы и со лики святых
веселящаяся.

Радуйся, преподобная мати Евфросиние,
радость в любви ко Христу испытывавшая.

Кондак 7

Хотяй душу твою в селениих райских
упокоити, возвести тебе Господь, праведная
Евфросиние, день отшествия твоего к Нему. Ты
же, отцу своему земному тайну жития своего
поведавши, ко Отцу Небесному потекла еси,
воспевая Ему: Аллилуиа.

Икос 7

Дивная тайна о тебе открыта бысть Господем игумену и братии святыя обители, идеже ты подвизалася еси, святая Евфросиние, да прославится Бог, явивший крепкую силу Свою в немощней плоти твоея. Молися о нас, мати преподобная, Господу Иисусу Христу, да сподобит и нас скончавши праведно житие свое, достигнути спасения и водворитися со святыми Его, вопиющих к тебе:

Радуйся, иго легчайшее Христово от юности понесшая;

Радуйся, лучами чудес твоих страстей вещь поपालившая.

Радуйся, одеяние иноческое, яко ангельское, носившая;

Радуйся, исткану свыше ризу себе светозарную исходатайствовавшая.

Радуйся, огнем Божественныя любви сердце свое согревавшая;

Радуйся, росю благодати Божественныя душу свою орошавшая.

Радуйся, преподобная мати Евфросиние, радость в любви ко Христу испытывавшая.

Кондак 8

Странное чудо и непостижимое явися от святых мощей твоих, Евфросиние преблагая, егда некоему от братии, иже бе слеп на единый глаз, по лобзании тела честнаго твоего, отверзся око его. Видя исцеление сие, вся братия величала есть милость Божию, воспевая: Аллилуиа.

Икос 8

Всем была еси в назидание святым житием твоим, мати преподобная, яко в женском естестве мужескую крепость имела еси и победила еси супостата диавола. Подавай и нам крепость на подвиги и труды во славу Божию, восхваляющим тя:

Радуйся, яко святая мощи твоя благоухания исполнишася;

Радуйся, яко тех благоуханием мы ныне наслаждаемся.

Радуйся, врачевства струю обильно и богато источающая;

Радуйся, благородство души своея не уязвленным сохраняя.

Радуйся, на Христа Жениха непрестанно
взирающая.

Радуйся, от Него же благодать
приснотекущую получающая.

Радуйся, преподобная мати Евфросиние,
радость в любви ко Христу испытывавшая.

Кондак 9

Всю себе повинув Богови, воистину светел и
тверд ум имела еси, боголюбивая Евфросиние,
вся бо красная мира сего, яко во уметы вменила
еси и ничтоже возможе поколебати храм души
твоея, внегда воспевала еси Христу: Аллилуиа.

Икос 9

Витийство человеческое не возможе
изглаголати любви твоея, невесто Христова
Евфросиние, Христов бо храм явилася еси твоею
чистотою и целомудрием, темже вместила еси в
себе Святаго Духа. Чистотою души твоея
восхищаяся и в себе Святаго Духа стяжати
хотящии, восклицаем ти словесами хвалебными:

Радуйся, Богу Зиждителю песнопойщи с
девами ликуеши;

Радуйся, в Троице святей Господа неустанно прославляеши.

Радуйся, яко лозо богомудрая явилася еси;

Радуйся, яко к тебе приходящих вином благочестия напоила еси.

Радуйся, девства светлостью и иными добротами блистающая;

Радуйся, сияньми терпения и смирения твоего мир просвещающая.

Радуйся, преподобная мати Евфросиние, радость в любви ко Христу испытывавшая.

Кондак 10

Спаستися всем верным хотящим пример благий житие твое, богомудрая Евфросиние, имже Жениха своего Небеснаго прославляла еси, приимши бо крест последовала еси Христу, темже и со Ангелы ныне срадуешися, поя Ему: Аллилуиа.

Икос 10

Стена тверда еси всем верующим в Бога и с молитвами к тебе прибегающим, преподобная наша мати, не отвращаеши бо лица твоего от них: недужным исцеление испрашиваеши,

сырым утешение подаеши, обидимым и гонимым защитница еси. Мы же, таковую велию твою помощь и защиту принимая, с благодарностию взываем ти:

Радуйся, монашествующих славо и преподобных украшение;

Радуйся, в болезнях твоих зревшая Господа посещение.

Радуйся, лета младыя не жениху земному, а Жениху Небесному посвятившая;

Радуйся, яко жертва непорочная Христу пожершаяся.

Радуйся, яко на твоя мужеския подвиги со умилением взираем;

Радуйся, яко теми на одоление страстей наших ополчаемся.

Радуйся, преподобная мати Евфросиние, радость в любви ко Христу испытывавшая.

Кондак 11

Пение еже приносим ти, святая Евфросиние, несть довольно к прославлению преславных подвигов и трудов твоих, обаче, ведуще любовь нашу к тебе, внемли мольбам нашим, да души и

сердца наша благодатною силою исполняются,
уста же вопиют ангельскую песнь Творцу:
Аллилуиа.

Икос 11

Светозарная свеча еси в Церкви Христовой,
Богом избранная Евфросиние, во мраке жития
сущим неугасимая, у Престола Божия на
небесней свещнице поставленная, сего ради
воспеваем ти:

Радуйся, богатством твоим и похвалою
Христа именовавшая;

Радуйся, темже от Того богатства духовныя
непрестанно получавшая.

Радуйся, любовью твоею страждущих
объемлющая;

Радуйся, в свои объятия немощных
приемлющая.

Радуйся, таинница молитвенныя сладости;

Радуйся, хранительница благодатныя
радости.

Радуйся, преподобная мати Евфросиние,
радость в любви ко Христу испытывавшая.

Кондак 12

Благодать Божественную испроси нам у Господа, боголюбивая Евфросиние, да ею очистивши сердца и души наша, укрепляеми будем на делание добрых дел, имиже прославим в Троице славимаго Бога, воспевая Ему присно: Аллилуиа.

Икос 12

Поюще пресветлую память твою, добропобедная Евфросиние, почитаем великия подвиги и моления твоя, хвалим долготерпение и смирение твое, славим мужество твое в немощнем телеси, ублажаем святую кончину твою. О небесней славе твоей радуясь, со умилением сердечным вопием ти:

Радуйся, яко дело жития твоего земнаго продолжаеши;

Радуйся, яко на страже спасения нашего пребываеши.

Радуйся, лучами Евангельскаго учения в сердца наша проникающая;

Радуйся, силу в молитве от источника премудрости черпати нас научающая.

Радуйся, волю свою воле Божией сочетати нам помагаеши;

Радуйся, в скорби и болезни Небеснаго Врача призывати нас наставляеши.

Радуйся, преподобная мати Евфросиние, радость в любви ко Христу испытывавшая.

Кондак 13

О святая, всехвальная и многопобедная угоднице Христова Евфросиние! Нынешнее моление наше приемши, предстательством твоим сохрани ны от враг видимых и невидимых и испроси нам у Господа оставление всех наших прегрешений, жития нашего исправление и во Царствие Небесное невозбранное вхождение, да со всеми святыми воспевати непрестанно будем Богу: Аллилуиа.

Этот кондак читается трижды, затем икос 1-й и кондак 1-й

Молитва

О, святая преподобная мати наша Евфросиние! Ныне светло память твою празднующе, умиленными сердцами восклицаем ти: ты послушалася еси благаго Учителя Господа нашего Иисуса Христа, глаголющаго в

Евангелии: Иже любит отца или мать паче Мене, несть Мене достоин, и иже не отречется всего своего имения, не может быти Мой ученик, и всем житием своим последовала еси Ему. Испроси нам, мати наша Евфросиние, силы и действия Святаго Духа, во еже искоренити всякий грех в нас живущий и сотворити души наша в храмы Божии; воспламени сердца наша любовью ко Господу да исполним уста наша ко славословию Его и совершим хождение наше пред лицом Божиим во всяком благочестии и чистоте, да небесным предстательством твоим спасаеми узрим славу Божию, славяще Отца и Сына и Святаго Духа во веки веков. Аминь.

